



Universitätsbibliothek Paderborn

De Perfectionibvs Moribvsqve Divinis Libri XIV

Lessius, Leonardus

Antverpiae, 1620

Cap. II. Omnem iurisdictionem creaturarum descendere à iurisdictione
diuina.

[urn:nbn:de:hbz:466:1-46817](#)

5 Quinto, Habet summam potestatem puniendi: potest enim punire non solum in corpore, quois genere tormenti illud affligen-
do; sed etiam in anima, idque pena acerbissima & aeterna; nec illa
est tanta pena, quin possit infligere maiorem.

6 Sexto, Habet sumimam potestatem in remunerando: rependit enim pro obedientia & obsequiis sibi prelitis præmium aeternum,
nimirum gloriae & beatitudinis lux confortium. Terreni Princi-
pes aulicis & ministris suis non nisi terrena & extera, quæ ipsi in
terra inueniunt, pro omnibus obsequiis dare possunt: sanitatem,
robur, pulchritudinem, vitam longam, sapientiam non possunt.
Deus autem non solum ista omnia excellentissimo gradu, sed et-
iam longè maiora quam mens capere possit, seruis suis pro exiguis
laboribus confert.

Septimo, Non solum ipsius est omnia mala punire, & omnia
bona remunerari; sed etiam penas & præmia singulis taxare &
definire. neque enim alterius hac in re prescriptum, sed suum
decretum sequitur.

7 Ipse igitur supremam in omnes, omni loco & tempore, & quoad
omnia iurisdictionem habet, tamquam Rex regum, & Dominus do-
minantium. Ipse Rex seculorum, in cuius ditione omni tempore uni-
uersa sunt posita, cuius voluntati nemo potest resistere. Ipse supre-
mus legislator, a quo omnis lex iusta descendit; qui pro suo arbi-
trio potest nobis leges imponere vel laxare; qui omnium culparum
penas, & omnium meritorum præmia taxavit. Ipse supre-
mus iudex, qui Angelos & homines, viuos & mortuos est iudica-
turus, & singulis pro meritis præmia vel supplicia retributurus;
qui etiam intimas & occultissimas cogitationes nostras in lucem
proferet, discutiet, ponderabit, cui de omni verbo otioso reddi-
turi rationem.

i. Tim. 5.
Ibid. 1.
Esther 13.

C A P V T II.

Omnem iurisdictionem creaturarum descendere à
iurisdictione diuina.

8 **A**DIVINITATE omnis iurisdictio descendit ad creaturas, idque
duplici modo: naturaliter, & supernaturaliter. Naturaliter,
in ea quæ sunt præstantiora & perfectiora, ad gubernanda infe-
riora & minus perfecta. Sic Angelici spiritus habent auctoritatem

Q ad



ad regendum mundum corporeum, maximè hunc inferiorem; & caus^s suum effectum, vt pater filium, quamdiu directione eget; & agens suum patiens, vt maritus vxorem; denique totum suas partes, nimirum Respublica suos ciues. hoc ipso enim quo multi coēunt in vnam communitatem & Rempub. seu in vnum corpus politicum; hoc corpus iure natura^r habet auctoritatem in singulos, quamdiu sunt eius membra. Neque ad hoc requiritur alius singulorum consensus, quām qui necessarius est vt huic corporis sint partes & ciues: sicut in corpore naturali eo ipso quo aliquid est pars, subiacet gubernationi illius corporis & Rationis in eo pr̄sidentis. Itaque hæc naturalis iurisdictio seu potestas gubernandi inuenitur in quatuor combinationibus, nimirum in natura spirituali ad corpoream, in causa ad effectum, in agente ad patiens, in toto ad partem. Reliq^e iurisdictiones humanae descendūt ab istis, non modo naturali, sed hominū placito, idq^{ue} tripliciter: nimirum, vel ex commissione, vel ex punitione, vel ex conuentione. *Ex commissione* nascitur triplex forma regiminis. Velenim Respub. libera, cūm per se non possit se totū regere, sua potestate se priuat, & eam committit vni; & tunc est *Monarchia*: vel committit eam pluribus & pr̄stantioribus è Repub. qui absolutè regant, & hæc est *Aristocracia*: vel denique non se priuat, sed eam retinens committit suas vices aliquibus tamquam suis Officialibus, ea tamen vt pr̄cipua quæque (vt condere & abrogare leges, indicere bellum, & imponere vestigalia, & similia) sibi seruet; & hæc dicitur *Politia* & *Respublica*. Possunt autem hæc formæ variis modis misceri inter se & temperari. Nam etiam in Monarchica forma plura vel pauciora Optimatibus vel populo reseruari possunt: similiter in Aristocratica. Quia tamen iurisdictio communitatis est naturalis, numquam ita transfertur in vnum vel plures, quin maneat in populo tamquam in gadice, vt per eam possit populus deponere quod sibi pr̄fecit, si tustitiam seruare nolint, & Principatum in tyrannidem vertant, nec aliud remedium suppetat. *Ex punitione*, vt quando vna Respub. læsat aliam, & conuenta de damno vel iniuria non vult satisfacere. Tunc enim si ad arma ventum fuerit, & Respub. læsa superet illam armis, potest eam sibi subiicere, & iurisdictionem ac dominium in eam sibi vindicare. quò pertinet etiam iurisdictio in seruos bello captos. *Ex conuentione*, vt dum inter duas Respub. liberas conuénit certare prælio, vt victa subsit vietri; sicut olim Romani, & modò Barbari faciunt. Atque hi sunt

om-

omnes modi, quibus iurisdictio naturalis communicatur.

10 *Supernaturaliter* autem à Diuinitate descendit iurisdictio pri-
mò & immediate in humanitatem Christi. Sicut enim femina aliqua, quantumvis sit per se ignobilis & infimæ sortis, eo ipso quo assumitur à Rege in vxorem, eiisque matrimonio copulatur, accipit quamdam iurisdictionem in totum regnum, quia quodammodo fit unum cum Rege: ita etiam beatissima Christi anima totaque eius humanitas eo ipso quo assumpta est à Diuinitate in unionem hypostaticam ad Verbum, accepit iurisdictionem & dominium excellentissimum in vniuersam creaturam, idque duplii lege, Naturali & Positiua. *Naturali*, quia lex naturæ est, ut superiora & præstantiora regant inferiora: illa autem humanitas ratione unionis Verbi est superior & præstantior omni alia creatura. *Positiua*, quia Deus constituit illam humanitatem, seu Christum, quia homo est, Regem vniuersi, nimirum caeli & terræ. Vnde Matth. 28. dicit: *Data est mihi omnis potestas in celo & in terra*. Merebatur enim eius humiliatio, quia se humilauit factus obediens Patri usque ad mortem, mortem autem crucis, ut supra omnia exaltaretur, ut testatur Apostolus ad Philipp. 2.

*Supernatu-
ralis iuri-
dictio.*

11 Hæc tamen potestas non est tam illimitata quam Diuinitatis, ut per se constat, sed est restricta ad certum finem, nimirum ad salutem generis humani. Cum enim Christus quæ homo, sit Redemptor generis humani, data est ei in humanitate omnis iurisdictio congrua ad perducendos homines ad salutem. Itaque cum omnia officia & ministeria Angelorum, & totus hic mundi cursus sit propter salutem hominum; (omnia enim sunt propter electos) habet *Hebr. 1.*
Rom. 8.
iurisdictionem in omnes Angelos, & in vniuersam naturam corpoream. Vnde potest cuiilibet Angelo suum ministerium assignare, & ut hanc vel illam animam, hoc vel illud regnum custodiat, imperare: diabolo vires ad tentandum, ad nocendum in corpore vel animo laxare aut contrahere: circa cœlos & elemēta varia signa edere, horrendas mutationes efficere, pestem, famam, bellum mortalibus inferre, imperia transferre, & de omnibus regnis, eorumque bonis pro suo arbitratu' disponere. Potuit ipse fundamenta Religionis Christianæ (nimirum Sacra menta & Sacrificium) instituere, eorumque numerum, materiam, formam, effectum, modum, & obligationem definire. Ipse mentes hominum illuminare, voluntates ad se conuertere, & peccata omnia etiam absque Sacramentis condonare; ipse quos voluerit saluare potest, singulari

Q² eos



eos gratia dirigendo & protegendo; reprobare seu reiicere à sua cura qui id merentur: quamuis neminem ita deserat aut reiiciat in hac vita, quin relinquagilli satis auxilij ut possit redire ad veniam. Denique ipse horrenda illa signa, quæ exitum vniuersale præcurrerent, ad hominum pœnitentiam excitandam patrabit: ipse orbem accendet, & montium fundamenta comburet; ipse Angelos & homines, viuos & mortuos ad iudicium vocabit: ipse singulorum opera & cogitationes omnes discutiet, examinabit, ponderabit, & singulis pro meritis rependet; ipse catastrophen mundo imponet, cuiusque clausulam efficiet, & regnum futuri sæculi inchoabit. Hæc est iurisdictionis Christi Regis & Domini nostri, quæ ex Scriptis manifeste colligitur.

Psal. 109.

Dan. 7.

Matth. 28.

Philip. 2.

Apoc. 1. & 5.

Iurisdictionis

summi Pon-

tificis imme-

diata datur à

Christo, po-

tita legitima

electione.

Instituatur

Matth. 16.

Iouan. 2.1.

A Christi humanitate descendit immediatè in summum Pontificem. Hic enim non à Cardinalium Collegio, aut ab Ecclesia vniuersali iurisdictionem accipit, sicut Reges à populo; sed posita legitima electione Cardinalium, Christus Dominus immediatè ei iurisdictionem tribuit, & Ecclesiæ gubernaculæ committit. Non tamen idcirco dici potest summus Pontifex iure humano hanc potestatem habere: quia etsi descendat ab humanitate Christi, tamen confertur à persona Verbi, quæ est Deus. actiones enim sunt suppositorum. Vnde sicut alia quæ Christus Dominus noster statuit, sunt iuris diuinæ, ut Sacra menta & Sacrificium: ita etiam auctoritas Pontificia iure diuino constat, & à Deo immediatè datur: nimur ex vi illius ordinationis, qua statuit ut Petrus, & omnes eius legitimè electi successores, hanc potestatem in totam Ecclesiam haberent. Hæc tamen potestas in Pontifice non est ita illimitata sicut in Christo: non enim summus Pontifex accipit iurisdictionem in Angelos, aut in defunctos; neque etiam directè in infideles, aut in bona temporalia Regnorum; neque ad constitugndam Religionis Christianæ fundamenta, aut ad aliquid in illis mutandum, aut ad conferendam gratiam absque Sacramentis. Hæc enim omnia sibi Dominus reseruauit, tamquam pertinentia ad potestatem excellentiarum, quæ media est inter potestatem Diuinitatis & summi Pontificis. Sed accepit omnem potestatem necessariam ad regendam Ecclesiam Christi, iuxta principia & fundamenta à Christo tradita, eamque amplificandam & perducendam ad finem supernaturalem, ad quem ab ipso est instituta. Constituit illum Dominus suum Vicarium in absentia sua corporali, donec veniat ad iudicium, & Ecclesiam suam transferat in cælum. Quod instituatur

12

13

nuatur illis verbis Matth. 24. *Quis putas est fidelis seruus, & prudens, quem constituit Dominus super familiam suam, ut det illis cibum in tempore? Beatus ille seruus, quem cum venerit Dominus eius, inuenientur sic facientem.* Vicarius autem debet habere omnem potestatem sui Ordinarii, quae prudenti iudicio censetur necessaria ad regendum subditos: alioquin non poterit eos regere sicut Ordinarius, cuius vices gerit: idque maximè necessarium est, quando Ordinarius toto tempore regiminis est procul absens, nec consuli potest per nuntios vel literas. Sicut si Rex Hispaniae constitueret apud Indos Vicarium perpetuum absque recurso, deberet illi dari auctoritas Regia ad omnia ea quae sunt opportuna bono publico; nimur ad condendas leges, ad puniendos quosvis subditos delinquentes, ad indicendum bellum, ad evertendas urbes rebelles, & similia, quae ipse cum Concilio suo iudicaret ad bonum regni illius conducibilia. Eodem modo summus Pontifex debet habere omnem potestatem ad faciendum quidquid ipse cum suo Concilio ad bonum Ecclesiae iudicabit esse expediens.

*Pontifex Vi-
carius qualis
esse debens.*

15 A summo Pontifice descendit iurisdictio spiritalis seu supernalis ad reliquos Ecclesiae Praelatos certe quodam ordine, mediata vel immediate, & in omnes qui quoquo modo ordinarii vel delegatam potestatem habent. Hoc tamen intellige de iurisdictione fori externi, quae consistit in potestate regendi subditos, per quinque illos actus supra memoratos. Si enim loquamur de iurisdictione fori conscientiae ad absoluendum a peccatis, alia forte est ratio. Existimo enim, hanc iurisdictionem, quatenus se tenet ex parte causae efficientis, esse immediata a Christo Domino per sacramentum Ordinis Sacerdotalis. Etsi enim per hoc Sacramentum non dentur subditi aetu, datur tamen omnis potestas necessaria ex parte causae efficientis, & operantis remissionem peccatorum. Ratio est, quia potestas remittendi peccata & iustificandi peccatores est sublimissima, & planè diuina, sicut & potestas conflerandi. Quis enim posset remittere peccata, nisi solus Deus? Unde par non est ut conferatur ab homine, sed immediata a Christo Domino vi Sacramenti. Confirmatur: *Quia si praeter hanc potestatem qua conferitur Ordinatione, requiritur alia quedam potestas seu iurisdictio collata sola concessione summi Pontificis, vel alterius Praepati, ut ex illis duabus fiat una integra potestas actuaria absoluendi a peccatis: sequetur, potestatem Ordinis esse mancam, & quasi dimidiatam, seu inchoatam, quae debeat compleri iurisdi-*

*Iurisdictio
spiritualis
a summo
Pontifice.*

*Iurisdictio
fori conser-
tiae a Christo.*

Q 3

ctione

*Applicatio
materiae.*

ctione humana: ac proinde integrum potestatem absoluendi constare & conflari ex dupli potestate seu iurisdictione , quarum altera sit immediata à Christo, altera ex concessione Prelati. Quod non videtur rationi consentaneum : longe enim perfectius est, ut tota potestas, quæ effectu causat remissionem & iustificationem, sit immediata à Christo; & iurisdictio illa quæ datur à Prelato, solum sit veluti applicatio materiae , & per eam dentur subditi , sine quibus potestas actiua non potest exire in actum. Vnde illa iurisdictione se habet ut necessaria conditio , non ut pars virtutis actiuae remittendi peccata. Aliud enim est, habere potestatem remittendi peccata necessariam ex parte cause effectricis ; aliud, habere actu subditos, in quos ea utaris, ut multis exemplis ostendi potest. Verum fusior de his tractatus non est huius loci. Vide Gabrielem Vasquez tom.4 De Sacramentis, q.93.a.1.dub.2.

C A P V T III.

*De Dominio proprietatis, & duobus primariis eius
titulis, Creatione & Conseruatione.*

*Dominium
proprietatis.*

SECUNDО modo accipitur dominium pro iure disponendi de re aliquia pro suo arbitratu; ita ut possit illam consumere , vastare, conseruare, donare, sine cuiusquam iniuria . Sic homo propriè est dominus sui iumenti ; quiā habet ius illius utendi , veletiam perimendi, prout ipsi placuerit; nec roganti cur illud ita tractet, tenerur aliam reddere rationem, quām, *Sic placet.*

Hac ratione Deus est perfectissime Dominus totius creaturæ. Vnde in Scripturis ubique ferè vocatur Dominus : & creature dicuntur esse ipsius , ipsi seruire & famulari. 1.ad Tim.6. *Quem suis temporibus ostendet beatus, & solus potens Rex regum, & Dominus dominantium.* Psal.88. *Tu es calix, & tua est terra, orbem terræ & plenitudinem eius tu fundasti.* Psal.118. *Ordinatione tua perseverat dies, quoniam omnia seruunt tibi.* Iob 4. *Ecce qui seruunt ei non sunt stabiles, & in angelis suis reperit prauitatem.* Plal.115. *O Domine, quia ego seruus tuus, ego seruus tuus, & filius ancille tue.*

*Vnde habens
illud Deus.*

Habet autem Deus hoc dominium non occupatione, quasi res anteā fuerint adespota, & ipse veluti in vacuum mundi possessionem sit ingressus; non donatione, non successione , non emptione, qua ab alio id comparauerit; (quibus modis homines dominia

xerum